

楊襄毅公本兵疏議

楊襄毅公本兵疏議卷之二

覆監察御史徐棻建

督撫等官防

兵部尚書臣楊博等謹

題爲東南被倭地方貽害日久懇乞

天恩速賜申督將官愈加戒嚴以盡殄宿寇以永安財賦
重地事職方清吏司案呈奉本部送兵科抄出南京
湖廣道監察御史徐棻奏奉

聖旨該部知道欽此欽遵抄出送司案呈到部看得南京
湖廣道監察御史徐棻奏稱倭寇攻圍浙直地方猖
恣奔軼大約條奏七事有欲行於目前者二曰任將

曰料敵有欲行於事寧之後者三曰節財用曰處客
兵曰散黨餘有欲臨期議請而行者二曰遣使宣諭
曰經制海防言之甚詳慮之頗遠無非欲殄除醜類
計安地方之意但遣使宣諭關係 國體至於

勅諭附之朝鮮其勢為難既有總督文臣若又添設總督
武臣事體未免掣肘况沈希儀何卿近日各奉專

勅與巡撫都御史會同行事二臣夙抱忠猷必能共濟時
艱俱難別議外其言料敵委犯知彼知己之戒其言
處客兵在我委犯久暴師之戒其節財用尤為清源
正本之論至於消散黨與經制海防查與先後諸臣

謹白大略相同相應通行擬議合條

命下本部移咨總督軍務侍郎楊宜會同各該巡撫操江等官查照御史徐斌所議事理應徑行者徑自施行應奏請者詳議奏請不得玩愒因循徒爲文具嘉靖三十四年六月二十日題奉

聖旨是欽此

覆都給事中丘預達等責成邊臣防守邊鎮疏

題爲邊報日至乞

勅該部亟處孤危重鎮以圖安攘事職方清吏司案呈奉本部送兵科抄出兵科都給事中丘預達等題奉

聖旨該部知道欽此欽遵抄出送司案呈到部看得兵科都給事中丘預達等具題前因大率謂宣大二鎮外扼強虜內壯關輔事勢可憂宣府爲甚欲要從宜計處或發帑銀數萬兩或運京倉米數萬石再行賑恤其防秋事宜大要不出戰守二者通行各鎮著實舉行各一節除事關錢糧戶部徑自查議外爲照宣大二鎮切隣虜境虜若由大同而來則可以突入紫荆倒馬龍泉諸關虜若由宣府而來則可以突入鎮邊常峪橫嶺諸口由永寧四海冶而南則可以突入黃花渤海由獨石開平而東則可以突入古北石塘以

畿甸言之勢成唇齒以京師言之患切腹心即今兵馬饑疲地方凋敝戰則力不能支守則險無可恃自春徂夏往來侵軼不止十次防秋在近誠如都給事中丘預達等所慮但一應事宜節經臣等議擬具題奉有

俞旨全在當事之臣悉心戮力相應通行申飭合候

命下移咨總督宣大尚書許論薊遼侍郎王子忬會行各該鎮巡等官嚴督大小將領倍加防禦如賊犯居庸紫荆則宣大總督追躡於外薊遼總督拒守於內賊犯古北冷口則王子忬吳嘉會倚牆拒守必如去歲匹馬

不使入邊方爲上策一面各將防秋事宜節其要語刊刻成書分發大小官員令其便於遵守功成之日朝廷自有重大陞賞難以吝惜如或玩愒悞事聽臣等與該科具實叅奏應罷斥者罷斥應拏問者拏問總督官亦要遵照勅諭嚴明賞罰使官軍畏我而不畏敵方能制勝不得姑息目前徒爲文具嘉靖三十四年六月二十四日題奉

聖旨是欽此

議常孰縣陣亡知縣王鈇等卹典疏

題爲急報陣亡官員事職方清吏司案呈奉本部送兵

科抄出巡按直隸監察御史金澗題奉

聖旨該部看了來說欽此欽遵抄出送司查得先年棗強縣知縣段豸與大勢強賊劉七等對敵被賊殺死奉武宗皇帝聖旨段豸率領民兵登城禦賊親冒矢石不避難險賊已挫衄但衆寡不敵力盡被害義烈可嘉特贈太僕寺少卿與祭一壇仍著有司立祠春秋祭祀還廕他男一人做錦衣衛世襲百戶欽此又查得近日崇明

縣知縣唐一岑領兵迎戰倭賊殺死節奉

聖旨唐一岑死事可憫准贈光祿寺寺丞立祠廕子准行欽此俱經通行欽遵外今該前因查呈到部看得巡

按直隸監察御史金澍具題前因大率言蘇松淮揚等處倭寇猖獗在崑山一處雖獲功數百餘級在常熟諸縣則見衄五七次及稱常熟縣知縣王鈇忠誠素著文武兼優鄉宦叅政錢泮義率鄉人志存滅賊追賊到於上塘港口俱被殺死一節爲照知縣王鈇叅政錢泮身統孤兵手刃逆賊忠貫金石大讐外醜之心氣作江河允壯中華之盛一則有民社之司兵敗而死於義自安一則忿鄉土之厄見危授命其志可憫既經御史金澍具題前來該司查有段豸唐一岑事例若不先行甄錄無以彰前勸後合候

命下將王鈇錢泮各厚贈一官量與世廕一面立祀死所
歲時並祭仍各附入鄉賢名宦祠內以示優異嘉靖

三十四年六月二十四日題奉

聖旨這各官奮果不顧身追賊敵戰死事可憫王鈇贈太僕
寺少卿錢泮贈光祿寺卿各賜祭一壇還各廕一子與
做錦衣衛世襲百戶立祠依擬行欽此

覆南京兵部尚書張時徹等告急徵兵疏

題爲節報倭寇劫掠乞嚴防剿以固根本等事職方清
吏司案呈奉本部送兵科抄出南京兵部等衙門尚
書等官張時徹等題俱奉

聖旨兵部知道欽此欽遵抄出送司案呈到部看得南京兵部等衙門尚書等官張時徹等具題前因大率惟恐倭奴逼近南京欲嚴防勦以固根本患已剝床不得不爲戰守之圖除徵調兩廣湖廣等處官兵先已題奉 明旨難以別議外其一欲

勅總督操江等官督發軍兵緣南京在城兵素稱脆弱孝陵之兵徒爲充數萬一密邇郊圻委當深慮合無備行總督楊宜巡撫賈邦輔操江史褒善但通南京要路俱要多方設備如果侵犯京畿速調狼土等兵會合勦殺借股肱之力爲腹心之助毋得時刻延緩坐失

事機其二欲以總兵沈希儀石邦憲副總兵何卿推補南京五府僉書緣沈希儀何卿近奉

勅諭專管狼兵土兵石邦憲貴州勇情重大俱難擅動况近日已將通州副總兵段堂推補南京左府僉書彼中不知故有此奏合無聽張時徹將段堂從宜委用無事則操練兵馬防守城池有警則統領官兵隨賊勦殺其三謂曹松所統

孝陵軍餘三千員名無濟於事合無仍行張時徹等再加詳議如何處置方爲兵將之實應徑行者徑自舉行應具奏者星夜具奏但事體重大臣等不敢定擬均

乞 聖裁嘉靖三十四年六月二十八日題奉

聖旨是欽此

覆監察御史葉恩等極言倭患責成諸臣勦逐疏
題為倭寇愈肆猖獗殘害地方懇乞

天恩速賜督責勦除以伸 國威以救東南生靈事職方
清吏司案呈奉本部送兵科抄出南京河南道監察
御史葉恩奏前事又該南京湖廣道監察御史徐棻
奏為倭寇深入猖獗攻圍城池損傷將官懇乞

聖明亟賜查究處恤以責實効以振 國威事俱奉

聖旨兵部知道欽此欽遵通抄送司案呈到部看得南京

河南道監察御史葉恩南京湖廣道監察御史徐棻
交章具題前因大率皆言蘇松地方倭奴十分猖獗
在葉恩則欲速行總督巡撫等官同心戮力必使賊
首成擒妖氛蕩息其平望之捷論戰則敗浮於勝論
功則得不償失各該巡按御史務要從公查勘分別
功罪具實上聞遊擊周藩知縣王鈇鄉官錢洋破格
優恤斯昭勸懲之機在徐棻則欲巡按御史查究海
口失悞信地之官并查前後大小諸臣條陳海防事
宜地方官曾否遵行有無功效周藩王鈇錢洋褒崇
贈謚錄廢立祠超格優卹以爲文臣武將之勸南京

與在外軍衛有司俱要嚴防門禁毋使奸細乘間各
一節除周藩王鈇錢泮荷蒙

聖明恩數異常遠近聞之無不感泣再難別議外臣等竊
惟自有倭患以來文具雖多實効鮮著是故賞功罰
罪督餉調兵憫死卹傷以振九有之紀綱者

廟堂之事也仰蒙

聖明在上惠覃八埏明見萬里即如治總督張經周琬等
之罪狀錄周藩王鈇等之死事調兵遠及於蜀廣理
餉下及於椒木付趙文華以督察之權分沈希儀何
卿俞大猷以水陸之任瓦氏之兵寸長亦錄鍾富之

死一夫不棄。神謀聖筭可謂靡事不周靡思不到矣。至於練兵厲士運謀設策明瞭設險以相一時之機宜自是總督撫操等官之事。試觀諸臣兵果精練守果堅持戰果驍勇如錢洋王鈇哨果明的如燭照數計徒爲紙上之多文全無境內之少效一見負荷之重力不能爲則翻然求去悞國殃民誠可痛恨所據御史葉因祿忝所奏詞雖不同大要欲青效以滅殘醜之意相應議擬題請合候命下備行總督楊宜巡撫曹邦輔胡宗憲操江史瓌善等俱要仰思聖明簡任之恩生靈塗炭之甚痛將浮文盡行刊削一以

殺賊報國為主功成名立身受旌賞乃爲上策其次即當委身致命誓不與賊共戴天日如或泄泄效尤槩如往時不惟立致人言自亦難逃

天譴一面備咨都察院轉行各該巡按御史將平望功次并各起失事及查一切平倭事宜曾否奉行作速勘明分別功罪具實回奏其南京并各該州縣嚴明門禁事關涉機要誠非細故悉如徐栻所議一一舉行
嘉靖二十四年六月二十九日題奉

聖旨是欽此

覆宣大巡按御史李鳳毛青成邊臣用間購逆疏

題為虜謀異常人心危疑乞 勅當事 詔臣飭備脩戎
殄滅禍本以保重鎮事職方清吏司 亦呈奉本部送
兵科抄出巡按直隸監察御史李鳳 毛題奉

聖旨兵部看了來說欽此欽遵抄出送司 亦呈到部臣等
看得巡按直隸監察御史李鳳毛具 題前因大意謂
虜酋俺答等為謀異常皆逆賊丘富 田原等教令為
之又以左道邪謀誘哄邊民二賊不 去禍本不除兩
鎮之事不知所終欲行總督巡撫專 委副使楊順前
往左右二衛地方相機設處專理其 當一節為照宣
大二鎮乃京師之藩屏二鎮不固則 門戶既已踈虞

堂室自難安妥以故自我祖宗及我

皇上臨御以來於宣大地方尤為注意非徒以為宣大計寔為京師計也乃今自春徂夏始而數犯宣府幾震居庸鎮邊繼而屢擾大同將及紫荆倒馬以攻墩攻堡日異月殊左道邪謀神出鬼沒蠢爾俺荅何能及此寔皆逆賊丘富周原教令為之忘中國生養之恩為外虜腹心之用御史李鳳毛論之甚詳言足甚切臣等反覆參詳不勝憤激所據副使楊順既能慷慨自許施為措置必有可觀况總督尚書許論夙抱壯猷巡撫都御史齊宗道明習邊計委任責成以自能戮力同

心消除禍本相應通行議處合候

命下備行許論齊宗道會行楊順專住大同左右衛城經理前事或密用間諜或明示招致果使二逆就擒或彼逆悔禍自能投順事成之日

朝廷自有破格陞賞本部一面於馬價銀內動支一萬兩差官運送許論處專備楊順伺間取用不許別項支銷及照二人同心可以斷金機事不密則其害成念惟此舉關涉頗重倘蒙

聖明俞允臣等移文督撫兵備用人之際口授方略不許見之文移以致軍情漏泄該科亦不必傳貼邸報嘉

靖三十四年七月初三日題奉

聖旨是欽此

覆議常鎮兵備副使王崇古兼管溧陽等處疏

題爲懇乞

聖裁添設兵備以固根本重地事職方清吏司案呈奉本部送吏科抄出巡按直隸監察御史邊毅題奉

聖旨兵部知道欽此欽遵抄出送司查得先爲比例添設重地兵備官員以裨安攘事已將常鎮二府添設兵備官一員住劄常鎮二府地方往來整兵東鎮海洋北護腹心督截一帶江洋與蘇松兵備江北海防互

為犄角仍管轄所屬地方招選義勇整理兵餉置造
舟楫器械脩浚城池演習水戰往來巡行仍聽總督
操撫等衙門節制其府衛官員查照各省屬官禮體
遵行不許抗違阻撓題奉 欽依通行去後今該前
因查呈到部看得東南江防海道自我

皇宗以來上江自九江以至安慶下江自鎮江以至太倉
各有御史一員兵備一員又有操江都御史一員體
國經野設官分職已屬詳密但今倭奴無狀日肆跳梁
彼既分道窺伺我當隨處戒備以故近日江北則增
設淮揚海防江南則增設常鎮兵備審時度勢不得

不然御史邊毅又欲與溧陽地方添設兵備副使蓋因賊據太湖南可以窺湖州北可以窺宜興去溧陽不過百里溧陽去南京僅二百里控其要害重其彈壓其慮甚深其言甚詳但溧陽與常鎮相去密邇兵備王崇古素負重名新膺

簡命可以兼理其事似不必再增一官以滋煩擾合候命下本部將常鎮兵備責任另爲定擬換

勅一道齎付副使王崇古欽遵行事除常鎮二府照舊外仍不特於溧陽縣住劄應天府溧陽溧水句容高淳四縣併屬管理即將建陽宣州新安三衛止留城守

每衛各選驍勇二三千名指揮千百戶擇其堪充
領者定委數員部署管領如軍數不足於各衛強壯
軍餘并於徽寧池太等府民兵內揀取居常無事則
督率操練一遇寇入則相機截勦候事寧之日查照
原議奏請裁革嘉靖三十四年七月初六日題奉
聖旨是欽此

覆宣大總督尚書許論請縣賞格購擒虜酋疏
題爲走回人口供報夷情懇乞

天恩嚴行擒捕妖逆以拔禍本事職方清吏司案呈奉本
部送兵科抄出總督宣大山西等處地方軍務兼理

糧餉兵部尚書兼都察院右副都御史許論題奉

聖旨兵部看了來說欽此抄出送司卷查先為擒獲首惡
逆賊事該本部會題節奉

欽依覽奏生擒逆賊王三等朕心嘉悅劉伏玘賞銀一千
兩於應龍上加陞五級欽此又為北虜縛獻妖逆事該
兵部左侍郎史道題稱嘉靖三十年四月內大同開
市後五月內虜被妖逆蕭芹等誘惑入邊連犯二次
隨差通事王相等前去俺荅營內素要蕭芹俺荅令
家人僮元楊達子等四十人隨同脫脫了頭智假以
賣馬名色伴送蕭芹前到鎮羌堡邊外小旗特義將

蕭芹採住與同總旗楊鎮通事王相張彥文當即綁縛拏解前來本部覆題節奉

欽依時義陞指揮僉事賞銀一百兩楊鎮王相張彥文各陞一級賞銀十兩欽此今該前因通查案呈到部看得總督尚書許論具題前因查與巡按御史李鳳毛所題大略相同切緣近日宣大地方西則有酋首俺荅小把都兒東則有酋首辛愛大把都兒凶橫狡狴俱在吉囊之上逆賊丘富周原乃敢忍心害理為之腹心脅從呂廷桓趙全喬三等乃敢背盟忘恩為之羽翼以故雲中上谷之間無論春夏日肆侵軼地方孤

危之狀人心杞悅之情邊臣言之尚有未盡臣等聞之無任憂惶所據總督尚書許論欲要再加詳議定擬賞格一節無非激勵人心消除禍本之意係干重大邊情相應恭酌舊章議擬題請合候

命下備行總督許論巡撫齊宗道兵備楊順吁心戮力不
拘利誘間取計擒力捕但期早為擒獲以正

國典以快人心一應人等能斬獲俺答把都兒辛愛大頭兒首級來獻者封以伯爵賞銀一萬兩授以坐營坐府職銜管事若能斬獲立富周原首級來獻者不分首從授以指揮僉事各賞銀三百兩若能斬獲呂

廷桓等首級來獻者爲首陞三級賞銀五十兩爲從
陞一級賞銀三十兩若在虜華人及丘富周原或能
悔禍斬獲俺荅等一體陞賞若丘富周原呂廷桓等
徒身來歸雖無功級赦其罪狀仍量爲錄用生員張
蕙身繫虜庭心在王室間關告變九死一生忠義委
可嘉尚總督官先賞銀三十兩仍授以附近衛所所
鎮撫之職就留置軍門隨宜委用一面行移鎮巡兵
備將靜樂縣妖賊盧山佛等設法擒拏毋致滋蔓但
賞罰出自

朝廷臣等不致定擬嘉靖三十四年七月初六日題奉

聖旨是張蕙淮授所鎮撫欽此

覆蘇松巡按御史周如斗請添叅將疏

題爲添設將官以安地方事職方清吏司叅呈奉本部
送兵科抄出巡按直隸監察御史周如斗題奉

聖旨該部知道欽此欽遵抄出送司叅呈到部看得巡按
直隸監察御史周如斗題稱瓜儀鎮江留都之咽喉
江陰常熟蘇松之門戶吳松所又內地之區要金山
松海之邊疆乞要於瓜儀鎮江江陰常熟金山等處
添設叅將三員爲照

祖宗舊制自廣東福建浙江南直隸以至山東俱是沿海

一帶建置衛所并備倭都司控其要害原無腹裏地方遍設將官之事但今倭奴驕橫自異月殊蘇杭都會之區殘壞已極湖松財賦之所充斥特甚以故御史周如斗博采輿情欲於瓜儀鎮江江陰常熟金山等處添設叅將三員寔惟補偏救敝萬不得已之圖臣等就三叅而論之儀真具有守備又隸江北巡撫仍當附之通泰叅將併理至於蘇松二府合將備倭官改設叅將一員常鎮二府合設叅將一員大約俱與兵備副使會同行事文武兼資戰守有賴揆之事體似為穩便合候

命下將金山備倭都司裁革蘇松二府改設叅將一員常
鎮二府暫設叅將一員各住劄適中地方一應戰守
并操練民兵沙兵等項悉聽本官從宜處置凡事與
兵備副使會同計議停當而行仍聽總督巡撫副總
兵節制各該守備把總等官俱聽本官鈐束本部推
舉相應官員請

旨簡用定擬責任各請

勅一道齎付本官欽遵行事合用

符驗旗牌照例請給應該於何處募軍并募軍銀兩何項
出辦聽總督楊宜徑自查覈釐創之初未盡事宜楊

宜與巡撫都御史叶心計議以次具奏事寧之日
常鎮叅將即行裁革嘉靖三十四年七月十四日題奉
聖旨准議欽此

覆湖廣總督侍郎馮岳等勦撫苗寇功賞疏

題爲撫處重大苗情以靖邊患事職方清吏司案呈奉
本部送兵科抄出總督湖廣川貴軍務兵部右侍郎
兼都察院右僉都御史馮岳題前事又該本官與同
巡撫貴州等處地方兼理軍務都察院右僉都御史
張鶚翼巡按貴州監察御史陳劾古各題爲勦撫久
叛惡苗以安地方事俱奉

聖旨兵部知道欽此通送到司案呈到部看得總督湖廣
川貴軍務侍郎馮岳題稱撫處過播州等處苗夷緣
由要將土民任宸等押赴市曹梟首示衆楊烈羅綺
楊世臣楊贊安琮等吳坤趙懋王紳李將等俱行巡
按御史查照雲貴事例徑自提問歸結三牌阿項吳
平章等七牌潘潤等照舊安插隨事効勞官員特加
甄錄并善後一應事宜均乞議處及稱撫勦過酉楊
小平茶等寨惡苗獲功失事人員乞要查議各一節
爲照播州夷醜任宸等因事讎殺兵連禍結小平茶
惡苗龍老狗等倚恃天險負固不服罪惡俱已貫盈

流毒遍於三省撫之則乍臣乍叛徒損一國威勦之
則積餉調兵所費無量在平茶止動鵬勦其患尤輕
在播州湏動專征其事甚大地方控訴之人連章累
牘本部中飭之文至再至三玩日愒月竟無有肯任
之者乃今總督侍郎馮岳撫勦允中乎機宜先之以
振旅之威忠信大行於荒徼巾之以招徠之化不費
斗糧播州元兇授首特傳寸檄平苗茶寇歸心論功
本出於一時行賞當兼乎二事巡撫貴州都御史張
鶚翼叶心調度師出有名併力經營功收不戰原任
巡撫四川都御史張臬巡撫湖廣都御史汪大受與

有勩處之勞並收還定之勩以上三臣相應甄論其餘効勞官員查據總督馮岳所奏當以總兵官石邦憲副使劉望之叅議萬文彩僉事劉景韶爲首而何自然趙希夔等之功楊烈羅綺等之罪中間分別俱以明當相應通行依擬合候

命將馮岳特加陞蔭張鶚翼優加陞賞張自丕汪大受厚加恩賚石邦憲劉望之萬文彩劉景韶四員量加陞賞都司何自然守備潘雄吳繼祖指揮錢鳳翔楊鳳鳴耿光陳桂千戶安大朝八員量加陞仍入副使趙希夔量加陞俸叅將曹宗岱厚加賞賚布以高叅政

林懋和萬虞愷副使能達謝東山顧問僉事于錦少
卿孫璧叅將李英孫賢立潤知府吳江守備張大儒
指揮王廷光千戶林選李香舍人李玉一十七員名
量加賞賚各土官舍羅傑楊燭李松三名免其赴京
就彼准給冠帶書吏董卿鄒大緒黃詔黃萬表承差
楊紹孜李薦俱候外考外歷滿日起送赴部另行查
議百戶周俸總督軍門照例犒賞都司徐効節指揮
周鼎曹松千戶李時芳四員准其贖罪千戶郭禎行
貴州巡按御史楊烈羅綺楊世臣楊贊安珪等與吳
坤趙懋王紳李蔣等行四川巡按御史查照雲貴事

例各提問明白奏請發落任宸等會審無異處決梟
示三牌阿項吳平章等七牌潘潤等照舊安插務令
得所其播州善後之策大約四事其一建立哨堡以
扼險阻其二更置叅將以便統馭其三添設流官以
肅政紀其四責成該道以時巡歷計慮周詳曲處穩
便至於更置叅守添設流官二事尤中肯綮合無將
近年裁革銅仁叅將照舊復設移住石阡本部推舉
謀勇人員前去任事思石守備移於龍泉長官司住
劄兼制播州與叅將彼此控馭叅將原發符驗旗
牌見在就彼查領仍各奏改勅書一道在貴州則

思石都清二守並備并思南石阡二府所屬各長官司
黃平守禦千戶所并水西沙溪紅邊乖西等地方悉
以屬之在四川則重慶衛播州宣慰司及黃平等二
安撫司真州等六長官司悉以屬之在湖廣則偏橋
衛所屬瀟潭金峽峒等四十八旗屯鎮遠衛所屬金鵬
路瀨底干地施鐵廠等屯悉以屬之地方大小苗情
悉聽本叅從宜處置一面移咨吏部於重慶府添設
管糧兼管巡苗通判一員令其與龍泉守備同城居
住奏內一應事官悉如馮岳原議施行嘉靖三十四
年七月十五日昭愬奉

聖旨馮岳廕一子送監讀書張鶚翼陞俸一級併張臬汪
大受各賞銀三十兩以紵絲二表裏石邦憲劉望之等併
何自然等各陞一級趙希夔陞俸一級曹宗岱賞銀二
十兩高翀等各十兩吳江等各五兩李香等總督衙門
分別犒賞羅傑等准其給與冠帶郭禎并楊烈等各該巡
按御史提了問任宦等會審處決其餘依擬欽此

覆南京兵部尚書張時徹等選兵防護 孝陵疏

題爲急脩武備以備防禦事職方清吏司案呈奉本部
選兵科抄出南京兵部等衙門叅贊機務尚書等官
張時徹等題奉

聖旨該部知道欽此欽遵抄出選司查得先為前事該部

京左軍都督府堂 府事豐潤伯曹松奏稱

孝陵衛見有空閒舍餘三千一百餘名欲要會選添設防
守該本部議得南京 孝陵係

祖宗根本重地近因倭寇緊急本部題奉

欽依行令本爵專管防護今據奏稱前因無非脩武備以
振軍威之意但係平創始必須詢謀僉同事體方無

窒碍合行南京兵部會同內外守備叅替等官并戶
工二部科道衙門即查前項舍餘應否揀選以後地
方平寧或常川設立或仍行踈放其實回奏見今倭

本朝考之...
寇方熾合聽曹松權爲督練以備緩急不許因而悞
事嘉靖三十四年五月初一日題奉

聖旨是欽此又爲議處備倭事宜以固根本重地事該南
京兵部等衙門署部事南京戶部尚書孫應奎等題
稱孝陵遠在城外雖有豐潤伯曹松管領官軍防
護必須於正軍舍餘內選擇三千聽本爵演習該本
部議得即今倭寇奔潰密邇留都所據孝陵委當
重加戒備尚書孫應奎等會題前因無非臨事而懼
之意合行南京兵部將孝陵衛正軍內選五百名
舍餘內選二千五百名聽曹松管領操練仍行科道

行司屬官點閣嘉靖三十四年五月十八日題奉

聖旨是欽此已經通行去後今該前因案呈到部看得

孝陵選軍一事始而有豐潤伯曹松之奏繼而有尚書

應奎之奏即今尚書張時徹等又有此奏中間事體

雖詳略不同大率皆欲恪遵

成祖明旨專備奉祀不許別項差占之意至於補偏救敝

仰承

皇上孝思之誼張時徹等所議比之二臣尤為明備相應

通行依擬合候

命下備行南京兵部委賢能司屬官會同科道等官查照

先今事理正軍選五百名餘丁選二千五百名頂補
正軍共三千名專一食糧差操仍聽曹松照舊管理
每千名設千總一員五百名設把總官一員以後地
方平寧不許輕易廢撤其餘鉦鼓旗幟動支草場租
銀等項事宜悉如原議施行曹松既膺

簡命自當極力振舉大濟時艱不得循襲故常有悞大計
嘉靖三十四年七月十五日題奉

聖旨是欽此

覆南京兵部尚書張時徹等差官廣募兵疏

題爲急募精兵以備戰守以固重地事職方清吏司案

呈奏本部選兵科抄出南京兵部尚書張時徹等題
奉

聖旨兵部知道欽此欽遵抄出送司案呈到部看得南京
兵部尚書張時徹等具題前因大意惟恐倭賊突至
留難欲選精壯餘丁補伍以備守城募廣東新會順
德等處兵以備出戰中間計處俱已周悉除選補餘丁
一亦于先已覆議申飭督撫等官調度兵馬拱衛京師
屢經奉有俞旨外所據募兵銀兩并生名選差司
官事宜相應通行依擬合候

命下備行南京兵部劄行主事吳一瀾帶領草場銀一萬

八千一兩前去廣東會同彼處撫按官著落兵備守巡等官叶心召募慣戰民兵三千每名各給衣裝安家銀六兩令其自備鋒利器械添差知兵守巡官一員作速監督經過地方照調兵事例給與糧賞應付船隻馳至南京聽候分布截殺其分領哨隊官員聽監督官從宜委用兵貴精練不許以老弱充數兵貴神速不得以遲緩慢事至京之日每名日給工食銀四分仍不時量爲犒賞一應住止醫藥等項俱要處置停當以慰其心以作其氣其南京兵部銀兩以後止許本部動支年終造冊奏繳別部不得奏討司官如

不足用許於各部徑自選委有功之日一體甄錄如
或自分彼此希圖規避許張時徹等從實叅究施行
嘉靖三十四年七月十九日題奉

聖旨是欽此

覆巡撫山西侍郎王崇論遊兵光援延鎮疏

題爲走回人口供報緊急夷情事職方清吏司案呈奉
本部送兵科抄出提督鴈門等關兼巡撫山西地方
兵部左侍郎兼都察院右副都御史王崇題奉

聖旨兵部知道欽此抄出送可卷查先該巡撫延綏都御
史王輪題前事該本部議擬如賊侵犯調集附近兵

馬協力截堵等因又為疏計廣情廣集兵糧以尊京師以安畿甸重地事該本部條議將老營堡北樓口遊兵二枝一以防守本鎮一以應援紫荆以後薊鎮有警不必策應等因俱經題奉

欽依通行去後今該前因通查至到部看得巡撫山西侍郎王崇且題前因大率謂山西三關止設有老營堡北樓口遊兵二枝既有策應宣大之文又承入援紫荆之命東逐西馳已自難又復欲應援延綏非惟轉掣惟艱竊恐顧此失彼欲亟請明以便調遣一節為照延綏山西地方接壤勢如唇齒原設遊兵彼此

交相應援 勅諭開載詳明但宣府大同京師之門
戶紫荆倒馬京師之肘腋斟酌輕重緩急山西之兵
止當東援宣大紫荆事體甚明若使再援延綏顧此
失彼誠如侍郎王崇所慮既該本官具題前來相應
依擬題請合候

命下本部備咨王崇查照先今事理將前項遊兵二枝加
意整搦如遇宣大紫荆有警悉聽總督尚書許論徑
自調度截殺其延綏縱有警報免行徵調嘉靖三十
四年七月十九日題奉

聖旨是欽此

覆給事中湯日新省調客兵團練土兵疏

題爲議處東南兵政以裨安攘事職方清吏司案呈奉
本部送兵科抄出禮科給事中湯日新題奉

聖旨兵部看了來說欽此欽遵抄出送司案呈到部看得
禮科給事中湯日新具題前因大意謂四川松潘等
處之兵不可輕調備言其不可者有七欲要酌量調
停申明前議團練土著之人以資戰守及要將沿海
衛所軍士娶爲清查仍要通行各省將例應充軍人
犯定發沿海衛分各一節爲照千里徵兵兵家所忌
且無言松潘調兵相去隔遠卽如狼兵土兵往返之

間各亦不下數千餘。臣等待罪本兵，非敢不為深長之慮。急則治標，其執不得不然。先據御史周如斗送到何卿揭帖，欲調川兵總計軍數，若不為多，俱係何卿舊日部曲，律以兵將相識之義，臂指相使之情，自難裁省。且何卿近奉勅諭，兼管湖廣土兵，即今土兵既已聽還，再無別兵可用。頃者御史李秋議調酉陽冉高之兵，即係何卿原調之數，計奉

俞旨，已及兩月，各兵久當就道。若使中途阻歸，未免益滋勞擾。至於教練鄉兵，事半功倍，可謂知要之言。節經本部題奉，欽依督催文移，不下二十次，每次不

下千數百言當事諸臣玩月愒月止以虛文塞責未見成效誠如給事中湯日新所論其沿海衛所徒懸尺籍委果空虛所據清查舊額改發新充二事救弊補偏相應通行依擬合候

命下移咨總督侍郎楊宜將何卿原前開調川兵差人催取至日交付本官統領相機截殺以後松潘等處之兵再不許輕易奏調一面會同巡撫都御史曹邦輔胡宗憲嚴行兵備海防軍衛有司等官一意召募鄉兵設法教練稽查額盈嚴文勾補務濟實用不許專恃調兵坐貽民患通限兩月以裏巡撫官各將練過

鄉兵清過額兵緣由具實回奏績用有成容臣等請
旨獎飭如仍前欺玩叅奏治罪一面通行南直隸浙
江江西湖廣福建廣東廣西等處巡撫都御史無巡
撫處巡按御史暫將例應邊遠充軍人犯俱發浙直
沿海衛所以實行伍候事寧之日另議停止嘉靖二
十四年七月二十三日題奉

聖旨是欽此

議蘇松兵備叅政任環等軍功陞賞疏

題爲捷音事職方清吏司案呈奉本部送兵科抄出工
部右侍郎趙文華題奉

聖旨兵部看了來說欽此欽遵抄出送司案呈到部看得
工部右侍郎趙文華具題前因大率謂先次則原任
太倉州知州熊桴等擒斬賊級一百三十餘名額後
次則嘉定縣知縣楊旦等擒斬賊級一百五十名額
雖由各官自奮皆參政任環統率訓作所致乞要將
任環授以 欽降官銜如武職遊擊之任能桴准補
董邦政僉事員缺楊旦 欽命加襲其餘有功官員
并陣亡人等早加激勸各一節爲照參政任環義動
三軍身經百戰一生九死倭奴共憚其威名萬瘁千
勞部曲均切于感憤竒討每聞膚功屢奏委應顯擢

但王親不許京職事在吏部文職改授武銜查無舊章僉事董邦政見任管事聽降知州熊桴無缺可以陞補其知縣楊旦把總楊尚英劉堂王應麟田應山判官張大倫典史鄭灼等同心協力共成此捷既該侍郎趙文華甄別明白具題前來俱已允當相應通行依擬合候

命下將任環厚加陞賞照舊管理兵備事務或照大同知府王誥事例特廕一子爲原籍衛分百戶就令隨軍殺賊熊桴准復原職量陞蘇松二府府佐職銜仍留教練沙兵以爲任環臂指之用楊旦優加賞資候積

有年勞不次擢用楊尚英劉堂各陞二級王應麟量
陞一級田應山鄭灼免其軍罪各給冠帶張大倫等
總督軍門優加賞犒仍咨行吏部遇缺陞用陣亡水
兵陳欽程六與被傷張子春等先行優恤其稱有功
官軍早加激勸一事誠得賞不踰時之意但近來倭
功節據督撫等官所奏或首級數目多寡不同或交
戰日期前後互異或隱匿失事專一張大其功或畏
避罪愆人各自立門戶臣等每遇奏到不敢憑信輒
行巡按御史紀勘至今未見回奏若使總類一疏頭
緒繁多益無可完之期合無准行浙江南直隸江南

江北御史各將本地方功罪逐起勘明各另奏報臣等叅詳無異即與議覆賞格既得速行

恩典不至冒濫似爲長便臣等再惟賊雖狂悖得利思歸人情之常但因風汛未順不免於此留滯在我防禦之法賊若屯結不動則當力爲搗巢切勿觀望賊若仍行流劫則當痛加勦殺無容畏縮趙文華謂賊有退意則宗憲謂賊數不多果如二臣所言其勢比之前日似有可爲合無備行總督楊宜等作速定擬務見底儘一則江南千百萬戶生靈急當置之衽席之上

上一則京師四百萬糧儲不宜仍爲豁免之圖民情

國計關係不輕全在當事諸臣加意振飭如仍前玩愒則張縉李天寵之罪狀具在可以爲鑒嘉靖三十四年七月二十七日題奉

聖旨任環麻沽一子與做原籍衛所副千戶隨軍殺賊能俘陞蘇州府同知添註教練鄉兵楊尚英等陞二級王應麟陞一級田應山等准免軍罪給與冠帶楊曰賞銀二十兩張大倫十五兩這賊日久未平著督撫官等加意逐勦以靖地方不許玩怠欽此

覆巡江御史金淵等請懸賞格購倭逆首疏

題爲逆賊罪惡著明亂本已得悉乞宸斷昭揭討賊

大義以定人心以彰

聖武以肅清江海事職方清吏司案呈奉本部送兵科抄
出巡按直隸監察御史金淞題前事又該巡按直隸
監察御史陶承學奏爲計勦海寇以急救生靈保安
地方事俱奉

聖旨兵部知道欽此欽遵通抄送司案呈到部看得巡按
直隸監察御史金淞陶承學具題前因任金淞則謂
王五峰久住日本主使入寇在陶承學則謂王直主
謀煽禍連歲不已俱要懸立爵賞俘馘賊首無非消
除禍本肅清大憝之意查得王直即王五峰本以華

人甘爲夷役剽掠海上潛行鬼蜮之謀余毒海邦公
肆虎狼之暴往時傳說之流言若不足愆于今直倭
之供由良有可據但昭揭黃榜事體重天擅難輕議
合無備行總督楊宜巡撫胡宗憲曹邦輔陳儒各將
王直罪惡刊刻榜文傳示邊海州縣多乃設策早正
國法以快人心一應人等有能斬獲王直目級來獻者
查照宣大近題事例封以伯爵賞銀一萬兩授以坐
營坐府職銜管帶有能斬獲黨惡如明山和尚者不
分首從各授以指揮僉事各賞銀三百兩在倭華人
或能悔罪將王直斬獲來降者一體陞賞如王直果

能悔禍徒身歸降聽總督官酌量奏請恭候

聖裁至於金澗所謂責成督撫大臣以圖撫勦萬金之功不使倖功於旦夕久任將領有司以期有勇知方之績不使玩愒於代遷深中一時用兵之弊合無悉如原擬備行督撫等官查照施行其陶承學欲將兩京十三省及緣事在見監大小武臣許令殺賊贖罪必須求其實效不可令其倖免合無通行各處將本犯仍舊監候果有弟男家丁情愿報効者許具告本部或總督軍門令其隨軍殺賊充軍者以擒斬十名顆為率充軍永不襲替者以二十名顆為率死罪者以

三十名類為率候紀功官覈勳至日請 旨贖罪陶
承學又欲公侯勳戚世臣畜養家丁以圖協勦中間
恐亦有力不能辦之人似難一槩責備合無通行魏
國公徐鵬舉等有能號召義勇督率家丁効用者不
拘多寡許開送南京兵部編入各營一體操練遇警
分布防守有功之日具奏獎賞如不念國事占愆不
發科道官從實叅究但前項事體俱屬重大臣等不
敢定擬嘉靖三十四年八月十二日題奉

聖旨是各處緣事大小武職往殺賊贖罪重犯死罪的不
准行欽此

覆督察軍務侍郎趙文華條陳海防疏

題為條陳會議海防長策事職方清吏司案呈奉本部
送兵科抄出督察軍務工部右侍郎趙文華題本

旨該部看了來說欽此欽遵抄出送司案呈到部看得
督察軍務工部右侍郎趙文華題稱脩復海防整為
五事臣等及覆參詳均係平倭長策蓋不欲鏖戰於
海上直欲邀擊於海中比之制禦北虜守大邊而不
守次邊者事體相同誠得先則制人之義但事務繁
多惟恐不便

聖鑒謹將原議列為五款開立前件議擬上請伏望

才學考卷之五 題詞 卷之二 三十一
呈上俯賜采覽勅下遵行地方幸甚嘉靖二十四年八月
二十八日題奉

聖旨准議欽此

一 國家防海之制臣等議得 國初更番出洋之
制極爲盡善至於列船港次猶之棄門戶而守堂室
浸失初意救弊補偏急當講畫無疑所據侍郎趙文
華欲分乍浦之船以守海上揚山蘇松之船以守馬
蹟定海之船以守大衢二山品峙哨守相聯既無淺
閣之虞又無避風之處去女爲有據又欲副總兵屯外
泊陳錢諸島尤足以扼賊三路之衝合無悉如所擬

備行督察總督巡撫總兵副總兵兵備等官會同集
議務要允中機宜以復

祖宗出洋之制其中果有未盡事宜聽其徑自酌處

一總兵駐劄海上臣等議得南之禦倭必資於船猶
北之禦虜必資於牆軌車騎勢不可缺不妨多備所
據侍郎趙文華今議之船見造則有福濟等船調取
則有廣東新會橫江船東莞大烏尾船又有寧紹台
溫浦魚海船及下八山捕魚等船又有蘇松捕魚沙
船緣廣船恐緩不及事魚船恐妨廢生理必須處置
得宜方無遺慮合無悉如所議備行督察總督巡撫

總兵副總兵等官一面催調廣船一面嚴督海道查處漁船此外不知再該造船若干錢糧應於何處出辦備細會奏以憑議處施行

一直隸與浙名雖異地臣等議得浙直俱連大海一水之地委當總作一家計處必須共守陳錢諸島分守馬蹟等三道事方周匝所據侍郎趙文華欲要總兵官正副二員分住金山臨山要會之地先守陳錢叅將分畫三道馬蹟等山各督信地審時度勢委不容已合無將副總兵俞大猷仍住金山再添總兵官一員住劄臨山東可以控蘇松南可以控浙福本部

會推相應官二員請旨簡用充總兵官總理浙直海防軍務住守臨山地方定擬責任請

勅一道令其欽遵行事合用

符驗旗牌關防照例請給副總兵以下俱聽節制未盡事宜仍聽督察督撫等官查明具奏

一海上既備臣等議得國初沿海一帶軍伍充足今議脩復舊伍誠爲要務但鄉兵選足一萬歲支半糧不知應於何項出辦合無備行督察總督巡撫巡按等官定委兩司該道官作速查議要見鄉兵一萬月給半糧每年總該若干應於何處處給南方地無

遺利閑田世少若議清查未免及滋侵擾之弊似當
停寢其餘事宜悉如所議施行

一出入波濤岸等議得當當其功則人心知勸故功
既有等賞自有差合無今後官軍於海裏獲功每倭
首一顆爲首者准陞二級爲從者照舊給賞若無首
級止獲賊船亦以大小論級總兵等官能使賊船不
能登岸即以保障論功斬獲首級數多臨期奏請超
格陞賞候倭患寧日此例停止其多處行糧一節事
在彼中悉聽督察總督巡撫等官徑自施行

議留漕運總兵官萬表力疾督運疏

題爲乞憐病患容臣調治以圖後報免悞

國計事職方清吏司案呈奉本部送兵科抄出提督漕運鎮守淮安地方總兵官南京中軍都督府署都督僉事萬表奏奉

旨兵部知道欽此欽遵抄出送司案呈到部看得提督漕運鎮守淮安地方總兵官萬表奏稱病勢日重醫藥弗效乞要回籍調治一節爲照總兵官萬表清苦之操經濟之才雅與鎮遠侯顧寰先後齊名在任則淮人戴之離任則淮人思之即今倭奴未靖撞蕩爲急不止漕運一事藉賴本官而已所據引疾求退情

雖迫切查無撫按衙門代奏似難准理合候

命下行令萬表不妨原務隨便調理如果疾未痊可一應
運務暫行參將黃印嚴督官軍刻期前進不許再行
瀆奏嘉靖三十四年八月二十八日題奉

聖旨漕運重事非疾人可理萬表准回籍調治員缺即推
相應的來看欽此

覆南京兵部尚書張時徹等倭寇京城功罪疏
題為飛報賊情事職方清吏司案呈奉本部送兵科抄
出南京兵部等衙門尚書等官張時徹等題奉

聖旨兵部知道欽此又該南京兵科署科事南京戶科給

事中朱文漢奏爲劇倭餘黨逼犯京城戮殺將領乞
賜嚴勅文武大臣亟行勦滅以杜後患以安根本事奉

聖旨兵部看了來說欽此又該南京浙江等道署道事本
道試監察御史侯東萊等奏爲飛報緊急賊情事奉
聖旨兵部知道欽此又該兵科都給事中丘預達等題爲
倭患重大乞

賜嚴勅臣工亟加平勦以固根本重地事奉

聖旨兵部看了來說欽此欽遵通送到司案呈到部看得
南京兵部等衙門尚書等官張時徹等兵科都給事
中丘預達等南京兵科署科事南京戶科給事中朱

文漢南京浙江等道署道事本道試監察御史侯東萊等各具陳前因大率言倭寇奔突南京城外大肆猖獗把總指揮朱襄蔣陞千戶姜誠百戶唐音俱被殺死張時徹乞要將朱襄等照例陞級褒恤陣亡勇士官軍給埋葬之資有功把總徐衡軍人李堂等給賞退走官軍查究朱文漢謂把總王漢之罪狀爲甚把總朱襄等之死事可憫欲將朱襄等照議加恤與仍中臨陣先退之律有功者明立賞格授以官職不幸而死厚給金帛查取無碍洲田及還官牧地授之一項半項朱文漢侯東萊等又欲要戒諭南京兵部

戶部總督巡撫操江等官整擷兵馬設備戒嚴遇警
策應宜預達等謂南畿之寇不除則柘林之賊愈肆
柘林之黨未滅則沿海內外諸凡不逞之徒乘釁竊
發不知所終欲安南京兵部及總督撫操等官彼此
協心以收平蕩四川兵到令何卿併力征勦乃罔後
艱及要將張時徹朱岳柳震特降

繪首重加戒飭徽寧太平三府各州縣文武官員行巡按
御史從實叅治各一節爲照前項倭奴數苦不多爰
自紹興潰圍而出中經徽寧太平突至南京格鬪轉
戰不下三千餘里即今奔入溧水尚無掃蕩之期事

出創聞情可駭異柘林巢穴之區既當掃除南京根本之地尤當戒備所據有功陣亡官軍并防守事宜既該各官交章具題前來相應通行議擬合候

命下將指揮朱襄蔣陞千戶姜誠百戶唐音應襲兒男起送赴部照例各陞世襲二級仍立祠死所歲時致祭陣亡勇士官軍并有功把總徐衡軍人李堂等聽南京兵部動支官銀分等恤賞退走官軍各先以軍法究治以後有功查照節年題 准事例陞賞臨陣退縮依律斬首陣亡者厚加優恤果有閒田酌量撥給以周其家本部移咨張時徹會行內外守備及南京

戶部查照節奉 欽依事理將京城內外兵糧防禦
事宜悉心經畫一面咨行總督侍郎楊宜巡撫都御
史曹邦輔陳儒操江都御史史褒善各遵照

勅諭嚴督大小官員將柘林之賊協力防禦其紹興流來
作惡倭賊限在日下務要擒獲以靖地方賊經徽寧
太平府衛州縣有無重大失事備行各該巡按御史
分投查勘有功有罪人員并王漢作速具奏及照叅
贊機務南京兵部尚書張時徹南京守備司禮監大
監郭璇何綬南京守備掌南京中軍都督府事撫寧
侯朱岳協同守備兼管南京右軍都督府事安遠侯

柳震均有守備之責難逃誤事之罪立預達等念其
任淺止欲重加戒飭張時徹等心不自安故欲力求
罷免但廢弛之餘已嘗連章經畫倉皇之際又能極
力拒堵情似可原伏望

皇上俯念緊急用人之際將各官降旨切責以責後效嘉
靖三十四年九月初一日題奉

聖旨朱襄等死事可憫伊男淮照例陞襲二級立祠罷張
時徹另議來說郭瑛等姑免究朱岳等罰住祿俸兩箇
月其餘依擬欽此

獲左給事中楊允繩請禁苞苴專平陵寇疏

題爲海寇猖亂日久師老無功懇乞

聖明亟新將習根極弊源以幸生民以安

宗社事職方清吏司案呈奉本部送兵科抄出戶科左給事中楊允繩題奉

聖旨兵部看了來說欽此欽遵抄出送司案呈到部看得戶科左給事中楊允繩具題前因反覆敷陳雖不下千言遡其大略則有二事其一論在外之弊謂用兵必先擇將將苟得人謀與法制三者皆具欲要督撫將臣以全制勝紀功御史奏報罪功不許隱蔽其二論在內之弊謂督撫等官到任有謝禮送揭則有候

禮皆取司府州縣以故官司蔑法誤事威令不行脩攘罔效欲要厥衛該科等衙門一體訪奏當事大臣正已奉公各一節爲照蠢爾倭奴呼朋引類侵擾江左者今已三年在蘇松嘉湖等處則積屍成丘流血成河備極慘毒之狀在兩廣川湖諸省則財匱於徵輸兵疲於調遣不勝騷動之憂仰蒙

聖皇在上軫念元元日勤宵旰更置督撫重臣以提其綱分別副叅裨將以承其目一切機宜悉關宸衷在廷臣則當夙夜匪懈以宣其猷在外臣則當盡瘁鞠躬以宣其力若猶取有司之財充關節之用滅紀蕩法

妾不容於堯舜之世所據給事中楊允繩極口論列義正詞嚴是誠清源端本之論臣等待罪本兵與有選將之責除督率司厲痛自脩省外伏望

皇上勅下在廷大臣各要洗心滌慮正己奉公一切交際悉從謝却以杜請托之私以彰表帥之體本部通行嚴衛并五城巡視御史遇有各處公差人役果有通賄情節嚴加訪拏干礙職官從實察究一面轉行南京科道官并各省巡按御史備查督撫等官今後果於司府州縣括取官銀以充私費或有司官科剋小民浸潤督撫許不時指名參奏其奏內所稱督撫將

官精選訓練多立哨探圖寫地形以全制勝毋日事
徵兵毋掇拾章奏巡按官奏報功罪務要明實數事
俱切中時弊合無悉如所擬備行侍郎楊宜等查照
遵行嘉靖三十四年九月初六日題奉

聖旨是欽此

覆大同鎮巡官齊宗道等傳報虜情隄備薊鎮疏
題爲緊急聲息事職方清吏司案呈奉本部送兵科抄
出巡撫大同地方督理軍務都察院右僉都御史齊
宗道征西前將軍鎮守大同地方總兵官左軍都督
廣都督同知韓承慶題俱奉

兵部知道欽此欽遵抄出送司茶呈到部看得巡撫大同都御史齊宗道等會題稱邊外達賊約有十萬勢犯寧虜堡一萬餘騎已從左衛黑龍王西空進入往正南行走後有灰塵不斷一節爲照變當預圖兵貴審勢不預圖則倉皇倥偬之際徒爲文具不審勢則先後緩急之序盡失機宜先據薊州宣大揭報賊欲三道入搶一窺居庸一窺古北一窺冷口臣等以聖皇在上京師爲重以故與總督許論王忬往復咨議大要以固守關隘爲主許論移住懷來以衛

陵寢王忬仍住密雲以便東西調度都御史吳嘉會專任

昌平總兵官周益昌專住馬蘭谷又將遼東總兵官
殷尚質調住冷口都御史蘇志臯調住山海關外其
餘分守各口副叅遊守等官星羅碁布處處周匝賊
虜覘知有備自七月以至八月下旬蜂屯威寧海子
一帶牽制我師意在乘虛奸狡之狀迥異曠昔乃今
竟自大同西嚮而入其為侵軼山西無疑但恐仍倣
前年故智或分趨蔚州或分趨渾源則紫荆之東居
庸之西不無可虞或打來孫把都兒果由古北冷口
分道而入則薊鎮之事更當深慮合無嚴行土堡相
度賊勢多方布置見今擺邊人馬不可輕撤必使彼

虜匹馬不得入邊方為上策本部一面咨行許論及大同都御史齊宗道副總兵田世威山西都御史王崇總兵官李賢保定都御史艾希淳總兵官龔業同心戮力守者務成保障之功以圖萬全戰者務收斬獲之績以期三捷賊退之後

朝廷自有重大陞賞如或怠緩誤事

國典具存難以輕貸其大同新任總兵官趙仰和與提督蕭漢交代明白即便星馳赴任不得遲緩去嘉靖三十四年九月初六日題奉

聖旨是欽此

覆宣府鎮巡官劉廷臣等請處李家庄僞夷疏
題爲叛華投虜誘引犯邊搶奪馬牛財物擒逆首以靖
疆場事職方清吏司案呈奉本部送兵科抄出巡撫
宣府等處地方督理軍務都察院右副都御史劉廷
臣鎮朔將軍鎮守宣府總兵官歐陽安題俱奉

聖旨兵部知道欽此欽遵抄出送司案呈到部臣等看得
中國之於夷狄順則撫之以恩叛則振之以威雖稱治
以不治而制禦之方不容偏廢卽如李家庄屬夷效
忠宣力如鼠和史大官兒者僅有數人至於包藏禍
心騷動地方者十常八九以故宣府之事醜虜之患

雖大而常少屬夷之害雖小而常多伏禍隱憂不可不早爲之所所據巡撫都御史劉廷臣等欲將羊羔子會審處決仍行東北二路叅將令其按季聽調撫賞一節中間處置悉合機宜相應通行依擬合候

命下備行宣大巡按御史將羊羔子再審無異律處決仍將首級梟掛沿邊以示懲戒一面行移許訂論劉廷臣歐陽安今後必須按季方許調集撫賞豈不有如鼠和之效順不妨從重犒賞如羊羔子之作薩子亦要設法擒拏此外或妄行求討或別生事端不許以輕易准從以啓戒心總督鎮巡官職專邊政各當極力主持

以嚴夷夏之防以脩威信之紀日後儻致釀成大患
責有所歸嘉靖三十四年九月初九日題奉

聖旨羊羔子依律處決欽此

覆蘇松巡按御史周如斗申飭督撫亟勦殘倭疏
題為境內寇勢漸殄餘孽尚留懇乞天威申誨督撫

諸臣嚴行盡勦以安重地事職方清吏司案咨王奉本
部送兵科抄出巡按直隸監察御史周如斗題奉

聖旨兵部知道欽此欽遵抄出送司案呈到部看但付巡按
直隸監察御史周如斗具題前因大率嚴催叔目撫
官將各起倭寇陸續擒斬數多風濤覆溺者無算誠

皇上聖德格天以致天神協助所致但尚留柘林沙上者
一千餘人登岸潛住民居者三百餘人欲要浙直兩
省合攻一節臣等及獲參詳賊之情狀如在目前蓋
蘇州之境與嘉湖相為唇齒柘林巢穴不除則嘉湖
之流劫未已今歲之事與來歲相為倚伏今歲兵威
不振則來歲之延蔓益滋臣等先已慮及於此節次
題奉 欽依亟處柘林之賊查與御史周如斗所議
大略相同相應通行申飭合候

命下備行總督侍郎楊宜督率兵將隨宜調度都御史曹
邦輔住劄松江由北路督兵都御史胡宗憲住劄平

湖由西路督兵水陸並進柘林務期一鼓擒之其自
浙中流至南京之賊不知此時何在亦要設法搜勦
以絕禍端一應軍務悉聽侍郎趙文華從實督察不
許自分彼此養寇殃民坐失事機嘉靖三十四年九
月初九日題奉

聖旨是欽此

覆致仕南京光祿寺卿張袞條陳禦倭五事疏

題爲獻末議靖醜夷安東南以上慰

聖心事職方清吏司案呈奉本部送兵科抄出原任南京
光祿寺卿今致仕張袞奏奉

聖旨該部看了來說欽此欽遵抄出送司案呈到部看得
原任南京光祿寺卿今致仕張袞因倭寇侵犯浙直
地方條奏五事俱於海防有益相應開立前件議擬
上請伏望

皇上俯賜裁允勅下督將等官欽遵施行嘉靖三十四年
九月初十日題奉

聖旨准議行欽此

一曰選將帥臣等看得三軍之命懸於一將將得其
人則凡用間設伏賞功罰罪一切機宜悉中肯綮全
勝在我敵無不破所據本官具奏前因誠爲要務見

今總副叅守等官荷蒙

聖明簡用更置一新合無悉如所議備行各官宣猷宣力
廓清大憝以稱今日推轂之意不得因循玩愒自干
天憲

二曰脩團結臣等看得團結鄉兵不惟省目前調兵
供億之費亦可爲日後地方永遠之圖節經本部題
奉

欽依連章累牘諄復懇切未見成效相應通行申飭令無
備咨督撫等官查照先今事理著實舉行有司如果
團練有法兵皆可用具實保薦不次擢用若仍前視

爲文具議奏罷斥以示懲戒

三曰審形勢臣等看得金山乍浦壤地相接倭奴一出乎彼即入乎此形若唇齒委當併守至於常熟之福山港三丈浦江陰之斜橋蔡港俱係要害兵無常守亦所當慮但金山備倭近攻蔡將常鎮又添蔡將一員金山臨山又設有正副總兵二員事已周匝似難別議合無備行督撫總副等官同心協力嚴加拒堵不得自分彼此坐失事機

四曰明官守臣等看得守令之官最爲親民但有興除朝發夕至本官所謂今之守令非不嚙然稱賢但

心不任事至如城郭以下廢墜當脩備豫當計以爲
擾民召謗一切置之不問深中時弊况今倭寇殘孽
流離瑣尾之民尤當加意撫恤合無備行總督撫按
等官嚴行令各該有司查照所議一一舉行違者指
實叅奏

五曰防隱憂臣等看得兵荒之際民不聊生始而爲
賊威所脅終而爲賊利所誘不得不相率從賊在我
供億浩繁誅求入骨隱憂伏禍委當深慮合無依其
所奏備行督撫等官行令有司招徠安輯收拾人心
至於糧差等項亦要酌量徵派不許擅自抽徵致貽

後患

覆浙直總督侍郎楊宜請調兵食疏

題爲陳乞調發將領軍餉長技以振兵威事職方清吏司案呈奉本部送兵科抄出總督南直隸浙江福建等處軍務南京兵部右侍郎兼都察院右僉都御史楊宜題奉

聖旨該部知道欽此欽遵抄出送司案呈到部看得總督軍務侍郎楊宜條陳三事除那借官銀充餉移咨戶部查議外其調用邊方將材調用邊箭長技皆係禦倭要務相應開立前件議擬上請伏乞

聖裁嘉靖三十四年九月十一日題奉

聖旨准議欽此

一調用邊方將材臣等看得侍郎楊宜欲要調用西北將領以備平倭之用蓋見江南兵將脆弱不堪驅策故有此奏但各邊將領見任者有地方之責難以輕動廢棄者多係被論罪謫或緣事未結之人未經旌薦亦難輒便收用况南北風氣不同習性亦異北產南用人情事體自不相宜合無備行楊宜就於彼中選取將材委用教習昔吳在三國備安江右尚且猛士如雲謀臣如雨

聖朝全盛之時動稱之人殊可駭異亟宜搜訪處置仍具

由咨部查考

一調用邊箭長官等看得侍郎楊宜欲要順天保定二巡撫衙門以民兵內擇選善用邊箭者一千名差官押送軍前以發各營一節先該御史李秋建議本部覆議候九月終旬將見在防秋山東保定容兵內請給犒賞並發二枝前去勦殺已經奉有

明旨合無斟酌前議聽本部移咨總督侍郎王忬於順天保定共選取慣使邊箭民兵一千名大約保定八百名順天二百名坐委相應官員統領前去聽候彼中

教練應用原編工食照常給與以爲安家之資浙直
巡撫官每名再各處給官銀三兩以爲脩裝之費其
山東民兵楊官既稱徑自調取二千本部原議民兵
不必再發以省俱億

議大同陣亡叅將丁碧卹典疏

題爲大虜入境損折將領乞 賜戒諭督撫重臣運謀
逐勦以勵後効以保地方事職方清吏司案呈奉本
部送兵科抄出巡按直隸監察御史李鳳毛題奉

聖旨兵部知道欽此欽遵抄出送司案呈到部看得巡按
御史李鳳毛題稱大同西路叅將丁碧在於地名馬

家依山坡與賊對敵奮力大呼突入賊陣被賊射中
右眼貫顱而死及稱本官素有忠義清慎著聞乞要
亟賜褒錄巡撫齊宗道總督許論 天語戒飭各一
節爲照邇來將領怯懦成風每遇賊至不嬰城以自
保卽結營以自全止爲一身規避之謀不顧萬姓荼
毒之慘今據叅將丁碧敢以一旅之孤兵力抗方張
之黠虜射貫頭顱捐軀之勇益奮身膏草野敢死之
氣猶生委應照例先行優錄總督尚書許論巡撫齊
宗道均有禦虜之責首遭損將之禍任雖不同責俱
難辭但此時賊方深入勢頗重大經畫調度間不容

髮既該御史李鳳毛論列前來相應通行議處合候
命下將丁碧贈爲都督同知另廕一子爲正千戶世襲立
祠死所歲時致祭以爲邊臣死事者之勸仍乞

天語嚴諭許論齊宗道務要督率將領隨賊向往相機截
殺以蓋前愆以收後効賊退之日聽巡按御史稽查
功次一併具奏嘉靖三十四年九月十八日題奉

聖旨是丁碧准贈都督同知廕一子與做正千戶世襲立
祠致祭依擬許論等著督率將兵相機殺賊不許悞事
欽此

楊襄毅公本兵疏議卷二終